

# Malaysia, Indonesia ambil tindakan terhadap EU

Usaha kerajaan melindungi industri sawit, selamatkan berjuta-juta pekebun kecil

Oleh Rohaniza Idris  
roha@bh.com.my

**Kuala Lumpur:** Malaysia menyertai Indonesia sebagai negara yang memfailkan tindakan undang-undang terhadap Kesatuan Eropah (EU) susulan tindakan diskriminasi blok ekonomi itu terhadap produk keluaran kedua-dua negara menerusi kempen antiminyak sawit.

Perdana Menteri, Tan Sri Muhyiddin Yassin, berkata beliau memaklumkan kepada Presiden Indonesia mengenai usaha Malaysia memfailkan tindakan undang-undang terhadap EU pada 15 Januari lalu kepada Pertubuhan Perdagangan Dunia (WTO), sama seperti yang dilakukan Indonesia pada Disember 2019.

"Malaysia akan terus bekerjasama dengan Indonesia dalam isu diskriminasi minyak sawit terutama memperkasakan Majlis Negara Pengeluar Minyak Sawit (CPOPC)," katanya pada sidang media bersama Presiden Indonesia, Joko Widodo sempena lawatan rasmi Muhyiddin ke Indonesia, semalam.

Sebelum ini, Kementerian Perusahaan Perladangan dan Komoditi (KPPK) memaklumkan bekerjasama dengan Jabatan Peguam Negara bagi menyediakan dokumen untuk memfailkan tin-



*Malaysia-Indonesia sependapat* kempen antiminyak sawit itu tidak berasas dan tidak menggambarkan kelestarian industri sawit dunia. (Fotohiasan)

**"Malaysia akan terus bekerjasama dengan Indonesia dalam isu diskriminasi minyak sawit terutama memperkasakan Majlis Negara Pengeluar Minyak Sawit.**

*Muhyiddin Yassin,  
Perdana Menteri*

dakan undang-undang terhadap EU membabitkan kempen antiminyak sawit blok berkenaan.

Tindakan itu diambil menerusi Mekanisme Penyelesaian Pertikaian (DSM) di bawah WTO ber-

dasarkan asas dan justifikasi serta selaras dengan prinsip amalan perdagangan yang sudah digariskan oleh badan dunia itu.

EU meluluskan Arahan Tenaga Boleh Diperbaharui EU II (EU RED II) bagi menyekat produk kelapa sawit pada Disember 2018 dan seterusnya *Delegated Regulation* pada Mac 2019.

*Delegated Regulation*, antara lain menerangkan kriteria atau metodologi bagi menentukan sama ada sumber dalam pengeluaran biobahan api menyebabkan kadar perubahan guna tanah secara tidak langsung (ILUC) yang tinggi atau rendah serta kesannya terhadap pelepasan gas rumah hijau.

Pengkategorian ini membawa kepada keputusan EU untuk menghentikan penggunaan minyak sawit untuk penjaan te-

naga menjelang 2030.

Muhyiddin berkata, tindakan Malaysia memfailkan tindakan undang-undang itu bagi memastikan negara dapat melindungi industri sawit, terutama bagi menyelamatkan berjuta-juta pekebun kecil yang bergantung hidup sepenuhnya kepada industri sawit di Malaysia dan Indonesia.

Katanya, Malaysia dan Indonesia juga menzahirkan kebimbangan mengenai kempen antiminyak sawit yang berlaku terutama di Eropah, Australia dan Oceania.

Perdana Menteri berkata, kedua-dua negara sependapat kempen antiminyak sawit itu tidak berasas dan tidak menggambarkan kelestarian industri sawit dunia serta bercanggah dengan komitmen EU kepada WTO mengenai amalan perdagangan bebas.